

nem fuisse tradit *S. Doctor* in epistola ad *Fidum*. *S. Augustinus* vero *lib. 10. de Genesi ad litt. c. 23.* de hac vetulita consuetudine baptizandi parvulos hæc scribit: *Consuetudo Matris Ecclesiæ in baptizandis parvulis nequaquam spernenda est, nec ullo modo superflua deputanda, nec omnino credenda, nisi Apostolica esset Traditio.* Apostolicam autem esse Traditionem diserte affirmat *l. 1. de bapt. c. 26. Et lib. 4. contra Donatistas c. 23. Quod traditum tenet universitas Ecclesiæ, cum parvuli infantes baptizantur, qui certe nondum possunt corde credere ad justitiam, & ore confiteri ad salutem, quod latro potuit: quin etiam flendo, & vagiendo, cum in eis mysterium celebratur, ipsis mysticis vocibus obstrepunt, & tamen nullus Christianorum dixerit, eos inaniter baptizari.* Idem constat ex *ep. 4. S. Damasi Papæ: Chorepiscopo non licet presente Episcopo infantem tingere, aut signare!* Hæc omnia satis aperte declarant pædobaptismum Traditioni non esse contrarium, cum ab ipsa Apostolica Traditione constet, esse profectum, ut etiam innuit *Canus l. 3. c. 4.*

§ XVIII. Probatur tertia pars. Ecclesiæ Patres uno eodemque sensu, ut verbis utamur *Vincentii Lyrinensis*, quem immerito carpit audacissimus *Joannes Dallæus*, manifeste, frequenter, perseveranter, velut quodam consentiente sibi Magistrorum concilio, accipiendo, tenendo, tradendo Apostolicam Traditionem de parvulorum Baptismo firmaverunt; summa igitur impudentia est, pædobaptismum Patrum auctoritati contrarium asserere. Re enim vera pro Apostolica Traditione, §. XIV. exposita, stant ex Græcis Patribus *S. Irenæus l. 2. c. 39. Origenes hom. 8. in Leviticum, & 14. in Lucam. S. Gregorius Nazianzenus or. 40. in Sanctum Baptisma. S. Joannes Chrysostomus hom. 40. in Genesim, Theodoretus in Epitome divinarum decretorum de Baptismo, & alii.* Ex Latinis vero *S. Cyprianus ep. 59. S. Ambrosius lib. 10. ep. 84. & de Mysterio Paschæ c. 5. S. Hieronymus ep. 7. ad Letam., S. Augustinus ep. 28. ad Hieron., & alii plures,* quos enumerare longum foret nimis, & molestum.